



Broj/Број: 01,02-50-1-1055/08  
Sarajevo/Сарајево, 29.10.2008.

## **Z A P I S N I K**

2. posebne zajedničke sjednice oba doma Parlamentarne skupštine BiH o temi: Poslanici/delegati pitaju – Vijeće ministara BiH odgovara, održane 29.10.2008., s početkom u 11 sati

**Prisutni članovi Parlamentarne skupštine BiH:** 33 poslanika iz Predstavničkog doma i 12 delegata iz Doma naroda.

**Opravdano odsutni poslanici iz Predstavničkog doma:** Adem Huskić, Selim Bešlić, Jozo Križanović, Sefer Halilović, Milica Marković, Snježana Rajlić, Jovan Todorović, Momčilo Novaković i Hadži Jovan Mitrović.

**Opravdano odsutni delegati iz Doma naroda:** Branko Zrno, Ivo Miro Jović i Mladen Ivanić.

**Prisutni članovi Vijeća ministara BiH:** Nikola Špirić, predsjedavajući Vijeća ministara BiH, Tarik Sadović, ministar sigurnosti BiH, Dragan Vrankić, ministar finansija i trezora BiH, Bariša Čolak, ministar pravde BiH, Sredoje Nović, ministar civilnih poslova BiH, Sven Alkalaj, ministar vanjskih poslova BiH, Safet Halilović, ministar za ljudska prava i izbjeglice BiH, Marina Pendeš, zamjenik ministra odbrane BiH, Vilim Primorac, zamjenik ministra vanjske trgovine i ekonomskih odnosa BiH, Srđan Arnaut, zamjenik ministra pravde BiH, Veselin Poljašević, zamjenik ministra komunikacija i prometa BiH, Senad Šepić, zamjenik ministra civilnih poslova BiH, i Osman Topčagić, direktor Direkcije za evropske integracije.

**Ostali prisutni:** predstavnici međunarodnih organizacija, i to: OHR-a, OSCE-a, EUPM-a, EUFOR-a, EUSR-a, kao i nevladinih organizacija NDI-a i Centri civilnih inicijativa.

**Sjednicu je otvorio i njome predsjedavao Niko Lozančić, predsjedavajući Predstavničkog doma Parlamentarne skupštine BiH.**

U uvodnim napomenama Niko Lozančić podjestio je prisutne da je, u skladu s članom 157. Poslovnika Predstavničkog doma i članom 148. Poslovnika Doma naroda, Zajednički kolegij oba doma Parlamentarne skupštine BiH sazvao 2. posebnu zajedničku sjednicu oba doma Parlamentarne skupštine BiH o temi: Poslanici/delegati pitaju – Vijeće ministara BiH odgovara. U skladu s poslovnicama oba doma Parlamentarne skupštine BiH, sjednica je sazvana 30 dana ranije, a Zajednički kolegij oba doma Parlamentarne skupštine BiH utvrdio je sljedeći

## **DNEVNI RED**

1. Usvajanje Zapisnika 1. posebne zajedničke sjednice oba doma Parlamentarne skupštine BiH o temi: Delegati/poslanici pitaju - Vijeće ministara BiH odgovara';
2. Pitanja poslanika/delegata – odgovori Vijeća ministara BiH.

## **Ad.1. Usvajanje Zapisnika 1. posebne zajedničke sjednice oba doma Parlamentarne skupštine BiH o temi: Delegati/poslanici pitaju - Vijeće ministara BiH odgovara**

### **Primjedbu na zapisnik imali su:**

- **Denis Bećirović** koji je konstatirao da je na strani 6. Zapisnika u zadnjem pasusu navedeno da će postavljeno pitanje biti proslijeđeno predsjedavajućem Vijeća ministara BiH, kako bi odgovor bio naknadno dostavljen. Zatražio je da se zapisnički konstatira da odgovor na postavljeno pitanje nije dobio, iako je prošla godina od održavanja 1. posebne sjednice.
- **Duškanka Majkić** imala je primjedbu na jezički nedosljednu verziju zapisnika na srpskom jeziku, zbog miješanja ćirilicnog i latinicnog pisma, te je zatražila da se o tome vodi računa u budućnosti.
- **Jerko Ivanković Lijanović** podsjetio je da je nepotpun odgovor na njegovo pitanje dala zamjenica ministra vanjskih poslova BiH, te je zatražio da se odgovor dopuni s preciziranim rokom.

**Zapisnik 1. posebne zajedničke sjednice oba doma Parlamentarne skupštine BiH o temi: "Delegati/poslanici pitaju - Vijeće ministara BiH odgovara usvojen je sa iznesenim primjedbama sa 12 glasova "za"u Domu naroda, te 29 glasova "za", jednim "protiv" i 1 "suzdržan" u Predstavničkom domu Parlamentarne skupštine BiH.**

## **Ad.2. Pitanja poslanika/delegata – odgovori Vijeća ministara BiH**

U uvodnom izlaganju o ovoj tački dnevnog reda Niko Lozančić podsjetio je prisutne da u skladu s članom 157. stav (3) Poslovnika Predstavničkog doma i članom 148. stav (3) Poslovnika Doma naroda, poslanik i delegat imaju pravo postaviti jedno pitanje u vremenu do tri minute i korekciju citata (repliku) na odgovore u istom trajanju. Postavljeno pitanje dostavlja se Vijeću ministara BiH najmanje sedam dana prije održavanja sjednice, i sva pitanja koja su dostavljena do 22.10.2009. proslijeđena su Vijeću ministara BiH.

Istakao je da je članom 149. poslovnika Doma naroda detaljno propisana procedura na samoj sjednici, te je nakon citiranja navedene odredbe konstatirao da će se rasprava na sjednici odvijati u skladu s njom.

Niko Lozančić konstatirao je da su pitanja za drugu posebnu sjednicu dostavili:

Iz Predstavničkog doma sljedeći poslanici:

1. Husein Nanić,
2. Šemsudin Mehmedović,
3. Salko Sokolović,
4. Azra Alajbegović (dva pitanja),
5. Denis Bećirović,
6. Sadik Ahmetović,
7. Sead Jamakosmanović,
8. Bajazit Jašarević,
9. Šefik Džaferović,
10. Bakir Izetbegović,
11. Mehmed Suljkanović,
12. Halid Genjac,
13. Milorad Živković,
14. Sadik Bahtić,
15. Ekrem Ajanović,
16. Slavko Jovičić, i

17. Branko Dokić.

Iz Doma naroda sljedeći delegati:

1. Ilija Filipović,
2. Dušanka Majkić,
3. Zoran Koprivica,
4. Alma Čolo,
5. Hazim Rančić, i
6. Slobodan Šaraba.

Nakon 22.10.2009. pitanja dostavili poslanici Lazar Prodanović, Rifat Dolić, Jerko Ivanković Lijanović, te delegat Rudo Vidović, koja, zbog neblagovremenosti, nisu prosljeđena Vijeću ministara BiH.

Na kraju uvodnog izlaganja o ovoj tački dnevnog reda, Niko Loznačić podsjetio je da će poslanici i delegati pitanja izlagati onim redoslijedom kojim su pristizala, s tim da će naizmjenično pitanja postavljati poslanici i delegati.

**U raspravi o povredi poslovnika**, koja se odnosila na način postavljanja pitanja i davanja odgovora na njih, učestvovali su: Zlatko Lagmudžija, Niko Lozančić, Sadik Bahtić i Nikola Špirić.

Nakon rasprave o povredi poslovnika, predsjedavajući sjednicom pozvao je poslanike i delegate da postave svoja pitanja.

**Poslanik Husein Nanić postavio je ministru komunikacija i prometa BiH sljedeće pitanje:**

"Činjenica je da Parlamentarna skupština BiH nije do sada raspravljala niti dobila informaciju o aktivnostima koje se vode u vezi s realizacijom projekta izgradnje Autoputa na Koridoru "Vc", a također nemamo informaciju o aktivnostima koje Vlada Republike Srpske vodi na utvrđivanju trase i izgradnji autoputa u Republici Srpskoj niti imamo urađenu strategiju transporta, niti akcioni plan Bosne i Hercegovine.

Iz sredstava informiranja možemo saznati da postoje određeni problemi u vezi s realizacijom projekta na Koridoru Vc u vezi s utvrđivanjem trase, načinom finansiranja pojedinih dionica (južne dionice Mostar i sjeverne dionice Svilaj-Odžak, prilikom nedavnih razgovora s Evropskom bankom u Londonu), dinamikom izgradnje itd.

Istovremeno, nezvanično možemo saznati da su utvrđene trase dionice autoputa kroz Republiku Srpsku, te da jedna od njih završava u Prijedoru ili Bosanskom Novom/Novom Gradu a druga dionica koja povezuje Banju Luku i Split prolazi kroz Glamoč, Livno i Tomislavgrad.

Postavljam pitanje ministru i tražim informaciju o stanju navedenog projekta i aktivnostima Ministarstva i Vijeća ministara BiH na realizaciji projekta izgradnje Autoputa na Koridoru Vc.

Također, tražim odgovor na pitanje da li je Ministarstvo upoznato i uključeno u aktivnosti koje vodi vlada Republike Srpske u vezi s utvrđivanjem trase i izgradnje autoputa kroz Republiku Srpsku a posebno s aspekta prometne povezanosti stanovnika i teritorije Unsko-sanskog kantona sa ostalim dijelovima Bosne i Hercegovine i susjednim državama s obzirom na činjenicu da je Unsko-sanski

kanton dio Federacije BiH koji teritorijalno odvojen od ostalog dijela Federacije BiH i koji je u navedenim planovima prometno potpuno zapostavljen i zaobiđen i od Vlade Republike Srpske i od Vlade Federacije BiH."

Odgovor na postavljeno pitanje dao je Veselin Poljašević, zamjenik ministar komunikacija i prometa BiH.

Husein Nanić je u svom komentaru na odgovor istakao da je on površan i nekorektan, te je zatražio dodatno pojašnjenje.

Veselin Poljašević dao je traženo pojašnjenje.

**Delegat Ilija Filipović postavio je Vijeću ministara BiH i ministru komunikacija i prometa BiH sljedeće pitanje:**

"Dom naroda Parlamentarne skupštine BiH je na svojoj 21. sjednici od 17. septembra 2008. usvojio Zaključak kojim Dom obavezuje Vijeće ministara BiH da odmah pokrene postupak osnivanja novog RTV kanala na hrvatskom jeziku, unutar Javnog RTV sistema BiH.

Zaključak je zaprimljen u Vijeću ministara BiH 18. septembra 2008., a 2. oktobra 2008. ovaj obavezujući akt objavljen je i u "Službenom glasniku BiH", broj 79/08, ali do danas, iako je prošlo više od mjesec dana, Dom naroda, ni javnost Bosne i Hercegovine, posebno Hrvati u ovoj zemlji koji su izuzetno zainteresirani za ovo pitanje koje za nas predstavlja vitalni nacionalni interes, ništa ne znamo o sudbini ovog akta Doma naroda Parlamentarne skupštine BiH.

Zato pitam Vijeće ministara BiH i ministra resornog ministarstva:

1. Šta je do sada preduzeto po ovom zaključku i dokle se došlo u postupku osnivanja novog RTV kanala na hrvatskom jeziku, s obzirom na činjenicu da ovo pitanje implicira suštinske izmjene i dopune Zakona o Javnom RTV sistemu BiH i uspostavu RTV kanala i na druga dva službena jezika, kao i poseban RTV kanal za potrebe nacionalnih manjina u Bosni i Hercegovini, a što je u skladu s normama domaćeg i međunarodnog prava?
2. Do kada možemo očekivati stavljanje u parlamentarnu proceduru izmjena i dopuna zakona iz ove oblasti, kako bismo konačno imali na pravedan i ravnopravan način reguliranu uspostavu javnih emitera u Bosni i Hercegovini, na zadovoljstvo svih gledalaca koji ih finansiraju, a ne samo nekih, i kako na javnim emiterima ne bismo imali samo prividnu, već stvarnu i Ustavom BiH propisanu ravnopravnu upotrebu službenih jezika u Bosni i Hercegovini?"

Odgovor na postavljeno pitanje dao je Veselin Poljašević, zamjenik ministar komunikacija i prometa BiH.

**Poslanik Šemsudin Mehmedović postavio je predsjedavajućem Vijeća ministara BiH, sljedeće pitanje:**

"Šta Vijeće ministara BiH namjerava uraditi da spriječi razgradnju institucija Bosne i Hercegovine, posebno sljedećih:

- Regulatorne agencije za komunikacije,
- Regulatorne agencije za električnu energiju,
- SIPA-e,
- Agencije za kontrolu bilja,
- Agencije za kontrolu hrane,
- Ureda za veterinarstvo.

Odgovor na postavljeno pitanje dao je Nikola Špirić, predsjedavajući Vijeća ministara BiH.

Šemsudin Mehemdović dao je komentar na odgovor i zatražio da mu predsjedavajući odgovori i na pitanje: "Kako Vijeće ministara BiH misli osigurati podjednake uslove privređivanja bosanskohercegovačkim privrednicima kao što to imaju i privrednici van Bosne i Hercegovine, naročito u zemljama CEFTA-e?"

Nikola Špirić dao je dodatna pojašnjenja, koja su bila usmjerena na postupak izbora direktora Regulatorne agencije za komunikacije.

**Delegat Dušanka Majkić postavila je Vijeću ministara BiH sljedeće pitanje:**

1. "Hoće li i kada će biti izvršen nacionalni balans u Ministarstvu sigurnosti BiH?"
2. Kakav je nacionalni sastav u svih 12 organizacionih jedinica Ministarstva sigurnosti BiH? Navesti sve nazive radnih mjesta, te kvalifikacionu i nacionalnu strukturu po radnim mjestima."

Odgovor na postavljeno pitanje dao je Nikola Špirić, predsjedavajući Vijeća ministara BiH.

**Poslanik Salko Sokolović postavio je ministru sigurnosti BiH sljedeće pitanje:**

"Da li je istina da u sigurnosnim službama Bosne i Hercegovine, ni na jednoj prvoj poziciji, nema Bošnjaka rukovodilaca (SIPA, DGS, Služba za poslove sa strancima, Federalni MUP, MUPRS-a, Policija Brčko Distrikta BiH, itd..)?"

U nekim institucijama svjesno se ne vrši kadrovsko popunjavanje, pa čak i povlačenje kadrova jedne nacionalnosti. Pitam zašto se to radi i ko je odgovoran?"

Tražim odgovor na pitanje da li je ovo tačno, te kako i kada Vijeće ministara BiH misli promijeniti ovakvo stanje."

Odgovor na postavljeno pitanje dao je Tarik Sadović, ministar sigurnosti BiH, i Nikola Špirić, predsjedavajući Vijeća ministara BiH.

**Delegat Zoran Koprivica postavio je Vijeću ministara BiH i ministru finansija BiH sljedeće pitanje:**

"Zbog čega Vijeće ministara BiH ne izvršava zaključke domova Parlamentarne skupštine BiH sa sjednica 13.2.2008. i 25.2.2008. pod brojem 2. i 4. Tim zaključcima Parlamentarna skupština BiH produžila je mandat Državnoj komisiji za reviziju odluka o naturalizaciji stranih državljana u BiH, poslije 17. februara 2008., za period od jedne godine, te utvrdila da će se članovima Komisije i sekretarijata Komisije isplaćivati naknada u iznosu utvrđenom odlukom Vijeća ministara BiH, br. 41/06. I pored toga, Vijeće ministara BiH ni do danas nije izvršilo te obaveze i članovima Komisije i sekretarijata nije od januara 2008. isplaćena nijedna naknada za njihov rad. Na taj način opstruira se rad Komisije za reviziju odluka o naturalizaciji stranih državljana u BiH, naturaliziranih u periodu od 6. aprila 1992. do 1. januara 2006. Riječ je o 23.441 spisu-predmetu, što jasno govori da je u pitanju ogroman posao, koji mora biti plaćen da bi uspješno bio priveden kraju."

Odgovor na postavljeno pitanje dao je Nikola Špirić, predsjedavajući Vijeća ministara BiH.

**Poslanik Azra Alajbegović postavila je ministru civilnih poslova BiH sljedeće pitanje:**

"Molim Vas za precizno tumačenje člana 28. Okvirnog zakona o visokom obrazovanju u smislu adekvatnog određenja naučnog djela. Da li su naučna djela samo originalni članci ili se u ovu grupu mogu uvrstiti i stručni članci, revijalni članci i prikazi slučajeva? Kako se tretiraju radovi koji su izašli iz štampe u periodu trajanja konkursa za izbor u zvanja?"

Odgovor na postavljeno pitanje dao je Sredoje Nović, ministar civilnih poslova BiH.

Azra Alajbegović iznijela je svoj komentar na dati odgovor, nakon čega je ministar Sredoje Nović dao dodatno pojašnjenje.

**Delegat Alma Čolo postavila je Vijeću ministara BiH sljedeće pitanje:**

"Šta će Vijeće ministara BiH učiniti na potpunom rasvjetljavanju zloupotrebe CIPS sistema i kako spriječiti mogućnost daljnjih zloupotreba? Koji je obim ovog upada i koliko može uticati na povjerenje, odnosno nepovjerenje građana i međunarodne zajednice u naš sistem, posebno u kontekstu razgovora o liberalizaciji viznog režima?"

Odgovor na postavljeno pitanje dao je Sredoje Nović, ministar civilnih poslova BiH.

**Poslanik Denis Bećirović postavio je predsjedavajućem Vijeća ministara BiH sljedeće pitanje:**

"Predstavnici političkih stranaka koje čine vladajuću koaliciju na državnom nivou su 3. januara 2007. potpisali sporazum u kojem su jasno definirali glavne programske ciljeve, nakon čega su potpisali i sporazum o rasporedu mjesta u Vijeću ministara BiH.

Na osnovu toga je predsjedavajući Vijeća ministara BiH Nikola Špirić, 11. januara 2007., razradio pomenute programske ciljeve u primarnom planu rada ministarstava u Vijeću ministara BiH.

Kao programski ciljevi, između ostalih, zacrtani su:

*1.5. Suzbijanje korupcije u BiH kroz ispunjenje obaveza koje BiH ima kao članica grupe zemalja Vijeća Evrope protiv korupcije (GRECO) ali i potpisivanjem drugih odgovarajućih međunarodnih pravnih akata te jačanje krivičnog zakonodavstva i sankcija predviđenih za korupciju.*

*3. Donijeti ustavna rješenja koja će uspostaviti funkcionalnu i modernu BiH s evropskim standardima.*

Uvažavajući navedene ciljeve, postavljam pitanje - šta je konkretno realizirano od pomenutih ciljeva Vijeća ministara BiH i vladajuće šestorke koja je izabrala i podržava Vijeće ministara BiH."

Odgovor na postavljeno pitanje dao je Nikola Špirić, predsjedavajući Vijeća ministara BiH.

Denis Bećirović, u svom komentaru, nakon izlaganja Nikole Špirića, istakao je da nije zadovoljan datim odgovorom.

**Delegat Hazim Rančić postavio je Vijeću ministara BiH sljedeće pitanje:**

"Vijeće ministara BiH i Vlada Republike Slovenije su, 11.12.1998., zaključili memorandum o razumijevanju između Vijeća ministara BiH i Vlade Republike Slovenije. Navedenim memorandumom obavezali su se da će kao partneri učestvovati na jednakoj osnovi u uklanjanju

posljedica rata u BiH, u deminiranju miniranih područja u BiH, i pomoći i rehabilitaciji žrtvama mina u BiH. Republika Slovenija osnovala je Međunarodni trust (povjerilački) fond za deminiranje i pomoć žrtvama mina u BiH ("Slovenački trust fond – ITF") koji, između ostalog, prikuplja sredstva namijenjena projektima deminiranja i pomoći žrtvama mina. Po mojim informacijama, za 2007. godinu ITF je prikupio i utrošio oko 25.700 000 USD.

Zašto je BiH dopustila da fond iz Republike Slovenije prikuplja i troši sredstva za deminiranje i pomoć žrtvama mina, zar to nisu u stanju raditi institucije BiH? Da li institucije BiH imaju precizne izvještaje o prikupljenim i utrošenim sredstvima u proteklih 11 godina? Kako je moguće da na veb-stranici navedenog ITF fonda stoji da se 3.700 000 USD potroši na podršku strukturi ili 593.000 USD za ostale namjene? Da li Vijeće ministara BiH ima namjeru uspostaviti BiH instituciju koja će prikupljati sredstva i efikasno ih trošiti na projekte deminiranja i pomoći žrtvama mina?"

Odgovor na postavljeno pitanje dao je Sredoje Nović, ministar civilnih poslova BiH.

Hazim Rančić, u svom komentaru, nakon izlaganja Sredoje Novića, istakao je da nije zadovoljan datim odgovorom.

**Poslanik Sadik Ahmetović postavio je ministru za ljudska prava i izbjeglice BiH sljedeće pitanje:**

"U Programu Vijeća ministara BiH za 2008. godinu jedna od aktivnosti je i donošenje revidirane Strategije BiH za provođenje Aneksa VII. Dejtonskog mirovnog sporazuma. Šta se uradilo vezano za ovu aktivnost, koji su ostvareni rezultati i koji su razlozi koji usporavaju donošenje ovako važnog akta za Bosnu i Hercegovinu?

Koliko je u tekućoj godini odobreno budžetskih sredstva na svim nivoima vlasti za rješavanje pitanja povratka izbjeglica i raseljenih lica i koliko je od tog iznosa usmjereno na druga pitanja, kao što su npr. ostanak u mjestima raseljenja?

Koji su najveći problemi u procesu povratka u Bosni i Hercegovini i koliko državna ministarstva uspijevaju koordinirati sve aktivnosti u vezi s povratkom i reintegracijom? Kakva je direktna saradnja entiteta u vezi s pitanjima važnim za povratak, a posebno pitanjima iz nadležnosti entiteta (zdravstvena zaštita, školstvo, socijalna zaštita, zapošljavanje i dr.)?

Koliko je sredstava ove godine odobreno za različite projekte u Srebrenici, koliko je od tih sredstva uloženo u proces povratka, prvenstveno u obnovu povratničkih kuća i druge projekte vezane za projekat?

U Bosni i Hercegovini u statusu ili bez statusa boravi i jedan broj izbjeglica iz drugih zemalja (Hrvatska, Srbija, Makedonija, Crna Gora, Palestina, Moldavija, Irak, Saudijska Arabija). Koliko je ovih lica podnijelo zahtjev za azil, a koliko ih je odbilo status izbjeglice, koliko je u proceduri? Kakva su saznanja o boravku onih koji nemaju status izbjeglice, niti su tražitelji azila? Šta su nadležne institucije u Bosni i Hercegovini uradile na planu prihvata i zbrinjavanja izbjeglica s priznatim statusom Bosne i Hercegovine?"

Odgovor na postavljeno pitanje dao je Safet Halilović, ministar za ljudska prava i izbjeglice BiH.

**Delegat Slobodan Šaraba postavio je Vijeću ministara BiH sljedeće pitanje:**

"Da li je tačna informacija da su lokalne vlasti Općine Ravno prodale zemljište koje je bilo namijenjeno za izgradnju graničnog prijelaza i kada će se početi rekonstrukcija graničnog prijelaza na Ivanici, s obzirom da su uslovi života i rada na ovom graničnom prijelazu izuzetno teški?"

Odgovor na postavljeno pitanje dao je Tarik Sadović, ministar sigurnosti BiH.

**Poslanik Sead Jamakosmanović postavio je Vijeću ministara BiH sljedeće pitanje:**

"Šta je s državnom imovinom, odnosno kada se očekuje donošenje zakona o državnoj imovini? Kada će se preduzeti aktivnosti na održavanju sastanka Stalnog zajedničkog odbora visokih predstavnika po pitanjima sukcesije bivše SFRJ, zbog niza otvorenih pitanja u vezi s mješovitim bankama (Aneks C), privatnom imovinom i stečenim pravima (Aneks G), i zbog novonastale situacije prodajom imovine preduzeća iz Bosne i Hercegovine u Republici Srbiji, te provođenja, odnosno deblokade pregovaračkih procesa po pitanju diplomatskih i konzularnih predstavništva BiH za koje znamo da ih država još nije preuzela?"

Odgovor na postavljeno pitanje dao je Nikola Špirić, predsjedavajući Vijeća ministara BiH.

**Poslanik Bajazit Jašarević postavio je Vijeću ministara BiH sljedeće pitanje:**

"Kada će Vijeće ministara BiH donijeti cjelovit plan ublažavanja negativnih efekata velike svjetske finansijske krize, koji se već osjećaju u svim zemljama regiona i u Bosni i Hercegovini?"

Odgovor na postavljeno pitanje dao je Dragan Vrankić, ministar finansija i trezora BiH.

**Poslanik Šefik Džaferović postavio je predsjedavajućem Vijeća ministara BiH sljedeće pitanje:**

"Koje aktivnosti je preduzelo Vijeće ministara BiH u posljednjoj godini dana na zaključenju Ugovora o državnoj granici Bosne i Hercegovine sa susjednim državama: Hrvatskom, Srbijom i Crnom Gorom, na bazi međunarodno priznatih granica Bosne i Hercegovine?"

Odgovor na postavljeno pitanje dao je Nikola Špirić, predsjedavajući Vijeća ministara BiH.

**Poslanik Bakir Izetbegović postavio je Vijeću ministara BiH sljedeće pitanje:**

"Vijeće ministara BiH je na 18. sjednici, održanoj 26. jula 2007., donijelo niz zaključaka u vezi sa starom deviznom štednjom, a između ostalog i:

*...inicirati aktivnosti prema nadležnim institucijama u svrhu predlaganja predstavnika u Radnu grupu koja će biti zadužena za razrješavanje devizne štednje kod nedomicilnih banaka (Ljubljanska banka i Invest banka Beograd), te Prijedlog o imenovanju uputiti Vijeću ministara BiH, kao i*

*...uputiti dopis prema nadležnim institucijama kako bi počelo prikupljanje podataka za Invest banku Beograd, na isti način kao što je slučaj s Ljubljanskom bankom.*

Šta je Vijeće ministara BiH uradilo u vezi s prethodnim zaključcima?

Također, šta je Vijeće ministara BiH, odnosno Ministarstvo vanjskih poslova BiH, kao koordinator aktivnosti, uradilo po pitanju inicijative za hitno rješavanje problema stare devizne štednje kod nedomicilnih banaka (Ljubljanska banka, Invest banka Beograd, i dr.) koju je uputilo Ministarstvo finansija i trezora BiH, odnosno zaključaka sa 56. sjednice Vijeća ministara BiH, održane 24.7.2008., a u vezi s pripremom materijala pod nazivom: *Prijedlog strategije i modaliteta načina razrješavanja stare devizne štednje kod Ljubljanske banke, Invest banke Beograd i drugih*



*nedomicilnih banaka*. Rok za postupanje po ovom zaključku bio je 30 dana, a od tada je prošlo 15 mjeseci."

Odgovor na postavljeno pitanje dao je Sven Alkalaj, ministar vanjskih poslova BiH.

**Poslanik Mehmed Suljkanović postavio je Vijeću ministara BiH sljedeće pitanje:**

"Šta su Vijeće ministara BiH i nadležna ministarstva do sada uradili sa ciljem bržeg donošenja odgovarajućih propisa usklađenih s evropskom regulativom i potrebama privrede Bosne i Hercegovine, prvenstveno za oblasti rudarstva, naftni i plinski sektor, hemijsku industriju i duge grane, koje pogađa nedostatak jasnih tehničkih propisa i odgovarajućih mjera za zaštitu života i zdravlja radnika i za sigurnost imovine i okoline?"

Odgovor na postavljeno pitanje dao je Vilim Primorac, zamjenik ministra vanjske trgovine i ekonomskih odnosa BiH.

**Poslanik Halid Genjac postavio je predsjedavajućem Vijeća ministara BiH sljedeće pitanje:**

"Kada Vijeće ministara BiH planira podnijeti zahtjev za punopravno članstvo Bosne i Hercegovine u Evropsku uniju? Zašto je Vijeće ministara BiH imenovalo Nacionalnog koordinatora za IPA fondove bez provođenja neophodne procedure i suprotno uobičajenoj praksi, i kako će se to odraziti na ispunjavanje obaveza iz Sporazuma o stabilizaciji i pridruživanju i Okvirnog sporazuma o IPA instrumentima?"

S obzirom da je pitanje postavljeno predsjedavajućem Vijeća ministara BiH, koji je zbog ranije preuzetih obaveza morao napustiti sjednicu, konstatirano je da će mu ono biti proslijeđeno, kako bi odgovor naknadno bio dostavljen.

**Poslanik Milorad Živković postavio je ministru sigurnosti BiH sljedeće pitanje:**

"Šta konkretno Ministarstvo sigurnosti BiH radi, uradilo je ili planira uraditi da ponudi kao odgovor Vijeću sigurnosti UN-a na tako ozbiljne tvrdnje kao što su postojanje lica ili organizacija povezanih s terorizmom u Bosni i Hercegovini."

Odgovor na postavljeno pitanje dao je Tarik Sadović, ministar sigurnosti BiH.

**Poslanik Slavko Jovičić postavio je ministru za ljudska prava i izbjeglice BiH sljedeće pitanje:**

"S obzirom da je već napravljen Prijedlog budžeta institucija BiH pitam Vas da li ste u Prijedlogu budžeta za rješavanje pitanja izbjeglih i raseljenih lica predvidjeli sredstva za Fond za nadoknadu uništene imovine izbjeglih i raseljenih lica, i ako jeste, o kojim sredstvima se radi?"

Odgovor na postavljeno pitanje dao je Safet Halilović, ministar za ljudska prava i izbjeglice BiH.

Poslanici Sadik Bahtić i Branko Dokić su, zbog službenog putovanja, morali napustiti sjednicu prije nego što su bili u prilici postaviti svoja pitanja, koja će biti proslijeđena Vijeću ministara BiH radi naknadnog dostavljanja odgovora u pisanoj formi.

Sjednica je završena u 14,10 sati.

Sastavni dio ovog zapisnika je transkript 2. posebne sjednice o temi: Poslanici/delegati pitaju – Vijeće ministara BiH odgovara.

Sekretar  
Predstavničkog doma  
Branka Todorović

Predsjedavajući  
Predstavničkog doma  
Niko Lozančić